

四庫全書

史部

欽定四庫全書

史部

文獻通考卷二百四十二

詳校官內閣學士臣瑞保

編修臣程嘉謨覆勘

覆校官中書臣孫希旦

校對官中書臣王彞憲

謄錄監生臣方汝觀

欽定四庫全書

文獻通考卷二百四十二

鄱陽馬端臨

貴與著

經籍考六十九

集詩集

陳氏曰凡無他文而獨有詩及雖有他文而詩集

復獨行者別為一類

阮步兵集

陳氏曰魏步兵校尉陳留阮籍嗣宗撰其題皆曰
詠懷首卷四言十三篇餘皆五言八十篇通為九
十三篇文選所收十七篇而已

宋武帝集一卷

陳氏曰孝武駿也

梁簡文集五卷

陳氏曰簡文帝綱也按隋志八十五卷唐已缺五
卷中興書目只存一卷詩百篇又缺其三首今五

卷皆詩總為二百四十四篇

梁元帝詩一卷

陳氏曰即湘東王繹

謝惠連集一卷

陳氏曰宋司徒參軍謝惠連撰本集五卷今惟詩二十四首惠連得名早輕薄多尤累故仕不顯死時才三十七歲

劉孝綽集一卷

欽定四庫全書

陳氏曰梁祕書監彭城劉孝綽撰宋僕射勔之孫
本傳稱文集數十萬言今所存止此又言兄弟及
羣從子弟當時有七十人並能屬文近古未有其
三妹亦並有才學適徐悱者文尤清拔所謂劉三
娘者今玉臺集中有悱妻詩

柳吳興集一卷

陳氏曰梁吳興太守河東柳惔文暢撰僅有十八
首

徐孝穆集一卷

陳氏曰陳太子太傅東海徐陵孝穆撰本傳稱其
文喪亂散失存者二十卷今惟詩五十餘篇

江總集一卷

陳氏曰陳尚書令考城江總總持撰總在陳為太
子詹事以宮端為長夜之飲及後主卽位當權任
日為艷詩君臣昏亂以至亡國入隋為上開府唐
志集三十卷中興書目七卷今惟存詩僅百首云

陰鏗集一卷

陳氏曰陳散騎常侍南平陰鏗子堅撰才三十餘篇杜子美云李侯有佳句往往似陰鏗今考之未見鏗之所以似太白者太白固未易似也子美云爾殆必有說

薛道衡集一卷

陳氏曰隋內史侍郎河東薛道衡元卿撰詩凡十九篇本集三十卷所存止此大抵隋以前文集存

全者亡幾多好事者於類書中抄出以脩家數也
史言道衡每至構文必隱空齋跣壁而卧聞戶外
人聲便怒其沉思如此

杜必簡集一卷

陳氏曰唐著作郎襄陽杜審言必簡撰工部之祖
也唐初沈宋以來律詩始盛行然未以平仄失眼
為忌審言詩雖不多句律極嚴無一失粘者甫之
家傳有自來矣然遂欲衙官屈宋則不可也

楊誠齋序畧曰必簡嘗為吉州司戶今戶曹趙君
彥清旁搜遠摭得其詩四十二首將刻棗以傳好
詩且以為戶廳之寶玉大弓屬予集之余觀必簡
之詩若牽絲紫蔓長即水荇牽風翠帶長之句也
若鶴子曳童衣即儒衣山鳥怪之句也若雲陰送
晚雷即雷聲忽送千峯雨之句也若風光新柳報
宴賞落花催即星霜元鳥變身世白駒催之句也
予不知祖孫之相似其有意乎抑亦偶然乎至如

往來花不發新舊雪仍殘如日氣抱殘虹如愁思
看春不當春明年春色倍還人如飛花攪獨愁皆
佳句也三世之後莫之與京宜哉

薛少保集一卷

陳氏曰唐太子少保河東薛稷嗣通撰稷道衡曾

孫魏徵外孫

喬知之集一卷

陳氏曰唐右司郎喬知之撰天授中為酷吏所陷

死集中有綠珠怨蓋其所由以致禍也

孟襄陽集三卷

陳氏曰唐進士孟浩然撰宜城王士源序之凡二百十八首分為七類太常卿韋縠為之重序

東坡謂浩然詩韻高而才短如造內法酒手而無材料耶

崔顥集一卷

陳氏曰唐司勳員外郎崔顥撰開元十年進士才

俊無行黃鶴樓詩盛傳於世

祖詠集一卷

陳氏曰唐祖詠撰開元十二年進士

崔國輔集一卷

陳氏曰唐集賢直學士禮部員外郎崔國輔撰開元十三年進士應縣令舉為許昌令天寶中加學士後以王鉷近親坐貶詩凡二十八首臨海李氏本後又得石林葉氏本多六首

綦母潛集一卷

陳氏曰唐待制集賢院南康綦母潛孝通撰南康

今贛州

儲光羲集五卷

陳氏曰唐監察御史魯國儲光羲撰與崔國輔綦

母潛皆同年進士天寶末任偽官貶死顧況為集

序

常建集一卷

陳氏曰唐盱眙尉常建撰

王江寧集一卷

陳氏曰唐龍標尉江寧王昌齡少伯撰與常建俱
開元十五年進士二十二年選宏詞超絕羣類為
汜水尉不護細行貶龍標世亂還里為刺史問邱
曉所殺為詩緒密而思清

李頎集一卷

陳氏曰唐李頎撰開元二十三年進士

崔曙集一卷

陳氏曰唐崔曙撰開元二十六年進士狀頭

杜工部詩集注三十六卷

陳氏曰蜀人郭知達所集九家注世有稱東坡杜詩故事者隨事造文一一牽合而皆不言其所自出且其辭氣首末出一口蓋妄人依托以欺亂流俗者書坊輒勦入集注中殊敗人意此本獨削去之福清曾噩子肅刻板五羊漕司字大可考最為

善本

宋子京贊唐興詩人承陳隋風流浮靡相矜至宋
之問沈佺期等研揣聲音浮切不差而號律詩競
相沿襲逮開元間稍裁以雅正然恃華者質反好
麗者壯違人得一槩皆自名所長至甫渾涵汪洋
千彙萬狀兼古今而有之他人不足甫乃厭餘殘
膏賸馥沾丐後人多矣故元稹謂詩人以來未有
如子美者甫又善陳時事律切精深至千言不少

袁世號詩史昌黎韓愈於文章少許可至歌詩獨推曰李杜文章在光焰萬丈長誠可信云

朱子語錄曰杜詩初年甚精細晚年橫逸不可當只意到處便押一箇韻如自秦州入蜀諸詩分明如畫乃其少作也人多說杜子美夔州詩好此不可曉夔州詩却說得鄭重煩絮不如他中前有一節詩好魯直一時固有所見今人只見魯直說好便却說好如矮人看場耳杜詩最多誤字蔡興宗正

異固好而未盡某嘗欲賡之作杜詩考異竟未暇也如風吹蒼江樹雨洒石壁來樹字無意思當作去字無疑去字對來字又如蜀有漏天以其西北陰盛常雨如天之漏也故杜詩云鼓角漏天東後人不曉其義遂改漏字為滿字似此類極多

門類杜詩二十五卷

陳氏曰稱東萊徐宅居仁編次未詳何人

類集詩史三十卷

陳氏曰莆陽方醇道溫叟編

王季友集一卷

陳氏曰唐王季友撰元結篋中集有季友詩二首
今此集有七篇而篋中二首不在焉杜詩所謂鄴
城客子王季友者意即其人也耶

陶翰集一卷

陳氏曰唐禮部員外郎丹陽陶翰撰開元十八年
進士次年宏詞

秦隱君集一卷

陳氏曰唐處士秦系公緒撰自天寶間有詩名藩鎮奏辟皆不就嘗隱越之剡泉之南安至貞元中年八十餘不知所終此本南安所刻余嘗於宋次道寶刻叢章得其逸詩二首書冊末

岑嘉州集八卷

陳氏曰唐嘉州刺史南陽岑參撰文本之曾孫天寶三載進士為補闕左史郎官與杜甫唱和

李嘉祐集一卷

陳氏曰唐台州刺史李嘉祐從一撰天寶七載進士亦號臺閣集李肇稱其水田飛白鷺夏木嘯黃鸝之句王維取之以為七言今按此集無之

右謝惠連陰鏗杜審言儲光羲王昌齡常建孟浩然岑參李嘉祐九家集鼂氏書錄在別集門所論已附在本門此更不重具

皇甫冉集一卷

鼂氏曰唐皇甫冉茂政丹陽人天寶十五載進士
為無錫尉歷拾遺補闕卒與弟曾齊名當時比張
氏景陽孟陽云集有獨孤及序

皇甫曾集一卷

陳氏曰唐侍御史皇甫曾孝常撰天寶十二載進
士兄冉後曾三載登第

郎士元詩一卷

鼂氏曰唐郎士元字君胄中山人天寶十五載進

士為郢州刺史與錢起俱有詩名而士元尤更清雅時朝廷公卿出牧奉使若兩人無詩祖行人以為愧

包何集一卷

陳氏曰唐起居舍人延陵包何幼正撰

包佶集一卷

唐史藝文志何佶皆包融之子兄弟齊名世稱二包融與儲光羲皆延陵人曲阿有餘杭尉丁仙芝緱氏

主簿蔡隱邱監察御史蔡希周渭南尉蔡希寂處士
張彥惟張湘校書郎張暈吏部常選周瑀長洲尉談
戡句容有王府參軍殷遙硤石主簿樊光橫陽主簿
沈如筠江寧有右拾遺孫處元處士徐延壽丹徒有
江都主簿馬挺武進尉申堂構十八人皆有詩名殷
蟠彙次其詩為丹陽集者

陳氏曰唐祕書監包佶選天寶六載進士兄何後
一年

錢考功集二卷

鼂氏曰唐錢起徽之父吳郡人天寶中舉進士初
從鄉薦客舍月夜聞人哦於庭曰曲終人不見江
上數峯青起攝衣從之無所見矣及就試詩題乃
湘靈鼓瑟也起即以鬼謠十字為落句主文李暉
深嘉之擢至高第釋褐授校書郎終考功與郎士
元齊名時曰前有沈宋後有錢郎

陳氏曰蜀本作前後集十三卷

韓翃集五卷

晁氏曰唐韓翃君平南陽人天寶十三載進士淄青侯希逸宣武李勉繼辟幕府俄以駕部郎中知制誥終於中書舍人翃詩興致繁富朝野重之陳氏曰翃以春城飛花之句受知德宗

顧況集二卷

晁氏曰唐顧況字通翁蘇州人至德二年江東進士善為歌詩性諧談德宗時柳渾輔政以祕書郎

召况善李泌及泌相自謂當得達官久遷著作郎
及泌卒有調笑語貶饒州司戶卒集有皇甫湜序
陳氏曰湜嘗言吾自為顧况作序未嘗許他人况
在唐蓋為人推重也集本十五卷今止五卷不全
嚴維集一卷

陳氏曰唐祕書郎山陰嚴維正文撰至德二載辭
藻宏麗科

耿緯集一卷

陳氏曰唐右拾遺河東耿漳撰寶應二年進士登科記一作緯

韋蘇州集十卷

陳氏曰唐韋應物京兆人天寶時為三衛後作洛陽丞京兆府功曹知滁江二州召還或媚其進媒孽之出為蘇州刺史詩律自沈宋以後日益靡曼鏤章刻句揣合浮切雖音韻諧婉屬對麗密而閑雅平淡之氣不存矣獨應物之詩馳驟建安以還

得其風格云

韓子蒼曰蘇州少以三衛郎事元宗豪縱不羈元宗崩始折節務讀書故其逢楊開府詩曰少事武皇帝無賴恃恩私身作里中橫家藏亡命兒朝持擣蒲局暮竊東鄰姬司隸不敢捕立在白玉墀一字都不識飲酒肆頑癡云云然余觀其人為性高潔鮮食寡欲所居埽地焚香而坐與豪縱者不類其詩清深妙麗雖唐詩人之盛亦少其比又豈似

晚節把筆學為者豈蘇州自序之過歟

徐師川云韋蘇州詩人多言其古淡乃是不知言
自李杜以後古人詩法盡廢惟蘇州有六朝風致
最為流麗

司空文明集三卷

陳氏曰唐虞部郎中京兆司空曙文明撰別本一
卷才數篇

李端司馬集三卷

鼂氏曰唐李端趙州人大歷五年進士為校書郎
卒官杭州司馬郭曖尚昇平公主賢明招納士類
故端等皆客之當坐上賦詩奇甚主大加稱歎錢
起曰素為之請賦起姓端立獻一篇云新開金埒
看調馬舊賜銅山許鑄錢起乃服主喜厚賜之

盧綸詩一卷

鼂氏曰唐盧綸與吉中孚韓翃錢起司空曙苗發崔
峒耿緯夏侯審李端皆能詩齊名號大歷十才子

綸字允言累舉進士不第

李益詩一卷

鼂氏曰唐李益君虞姑臧人大歷四年進士調鄭
縣尉幽州劉濟辟從事憲宗雅聞其名召為集賢
殿學士負才凌藉士衆不能堪暴其獻濟詩不上
望京樓之句以涉怨望詔降秩俄復舊益少負詞
藻長於歌詩與宗人賀齊名每作一篇樂工以賂
求取被聲歌供奉天子征人早行詩天下皆施之

圖畫今集有從軍詩五十首而無此詩惜其放逸多矣

陳氏曰益宰相揆之族子舊史本傳指其少有癡疾防閑妻妾過於苛酷有散灰扃戶之談聞於時故時謂之妬癡為李益疾按世傳霍小玉傳所謂李十郎詩開簾風動竹疑是故人來者即益也舊史所載如此豈小玉將死訣絕之言果驗耶抑好事者因其有此疾遂為此說以實之也

孟東野詩集十卷

鼂氏曰唐孟郊東野湖州人貞元十二年進士調
溧陽尉辟為興元參謀卒郊少隱嵩山性介寡合
韓愈一見為忘形交為詩有理致然思苦澁李觀
論其詩曰高處在古無上平處下顧二謝云張籍
諡為貞曜先生集宋次道重編先時世傳汴吳鏤
本五卷一百二十四篇周安惠本十卷三百三十
一篇別本五卷三百四十篇蜀人蹇濬用退之贈

郊句纂咸池集二卷一百八十篇自餘不為編秩
雜錄之家家自異次道總拾遺逸摘去重複若體
製不類者得五百十一篇四十聯句不與焉一贊
二書附於後郊集於是始有完書

賴濱蘇氏曰唐人工於為詩而陋於聞道孟郊嘗
有詩曰食齋腸亦苦強歌聲無歡出門如有礙誰
云天地寬郊耿介之士雖天地之大無以安其身
起居飲食有慙慙之憂是以卒窮以死而李觀盛

稱之至韓退之亦談不容口甚矣唐人之不聞道也孔子稱顏子在陋巷人不堪其憂回也不改其樂與郊異矣

朱倣詩一卷

鼂氏曰唐朱倣字長通襄陽人隱居剡溪嗣曹王臯鎮江西辟節度參謀貞元初召為拾遺不就

朱灣集一卷

陳氏曰唐永平從事朱灣撰自號蒼洲其為從事

李勉辟之也

麴信陵集一卷

鼂氏曰唐麴信陵貞元元年進士為舒州望江令以卒

長孫佐輔集一卷

陳氏曰唐長孫佐輔撰按百家詩選云德宗時人其弟公輔為吉州刺史往依焉當必有所據也其詩號古調集

柳宗元詩一卷

陳氏曰唐柳宗元撰子厚詩在唐與王摩詰韋應物相上下頗有陶謝風氣古律絕句總一百四十五篇在全集中不便於觀覽因抄出別行

東坡曰蘇李之天成曹劉之自得陶謝之超然固已至矣而杜子美李太白以英偉絕世之資凌跨百代古之詩人盡廢然魏晉以來高風絕塵亦少衰矣李杜之後詩人繼出雖有遠韻而才不逮意

獨韋應物柳子厚發纖穠於簡古寄至味於淡泊
非餘子所及也唐末司空圖崎嶇兵亂之間而得
詩人高雅獨有承平之遺風其論詩曰梅止於酸
鹽止於鹹飲食不可無鹽梅而其美常在於鹹酸
之外可以一唱而三嘆也子厚詩在陶淵明下韋
蘇州上退之豪放奇險則過之而溫麗清深不及
也所貴於枯淡者謂外枯而中膏似淡而實美淵
明子厚之流是也若中邊皆枯亦何足道佛言譬

如食蜜中邊皆甜人食五味知其甘苦者皆是能分別其中邊者百無一也

後村劉氏曰柳子厚才高他文惟韓可對壘古律詩精妙韓不及也當舉世為元和體韓猶未免諧俗而子厚獨能為一家之言豈非豪傑之士乎昔何文縝嘗語李漢老云如子厚詩人豈可不學他做數百首漢老退而嘆曰得一二首似之足矣文縝後從北狩病中詩云歷歷通前劫依依返舊魂

人生會有死遺恨滿乾坤雖意極忠憤而語不刻
急亦學柳之驗

張籍詩集五卷

鼂氏曰唐張籍文昌和州人貞元十五年登進士
第終國子司業籍性狷急為詩長於樂府多警句
元和中與白居易孟東野歌詞天下宗之謂之元
和體一本纔三卷

陳氏曰張洎所編錢公輔名木鐸集與他本相出

入亦有他本所無者凡十二卷近世湯中季庸以諸本校定為張司業集八卷且考訂其為吳郡人魏峻叔高刻之平江續又得木鐸集凡他本所無者皆附其末

王建集十卷

陳氏曰唐陝州司馬王建仲初撰建長於樂府與張籍相上下大歷十年進士歷官昭應縣丞太和
中為陝州司馬尤長宮詞在集中第十卷錄出別

行

漁隱叢話余閱王建宮詞選其佳者亦自少得只
世所膾炙者數詞而已其間雜以他人之詞如閑
吹玉殿昭華管醉折梨園縹蒂花十年一夢歸人
世絳縷猶封繫臂紗銀燭秋光冷畫屏輕羅小扇
撲流螢天階夜色涼如水卧看牽牛織女星並杜
牧之也淚滿羅巾夢不成夜深前殿按歌聲紅顏
未老恩先斷斜倚薰籠坐到明此白樂天也寶伏

平明金殿開暫將紈扇共徘徊玉顏不及寒鴉色
猶帶昭陽日影來此王昌齡也建詞凡百有四篇
又逸詞九篇或云元微之亦有詞襍於其間余以
元氏長慶集檢尋却無之或者之言誤矣

舊跋王建太和中為陝州司馬與韓愈張籍同時
而籍相友善工為樂府歌行思遠格幽初為渭南
尉與宦者王守澄有宗人之分因過飲相譏戲守
澄深憾曰吾弟所作宮詞禁掖深邃何以知之將

奏劾建因以詩解之曰先朝行坐鎮相隨今上春
宮見長時脫下御衣偏得著進來龍馬每教騎嘗
承密旨還家少獨奏邊情出殿遲不是當家頻向
說九重爭遣外人知事遂寢宮詞凡百絕天下傳
播倣此體者雖有數家而建為之祖也

李長吉集四卷外集一卷

鼂氏曰唐李賀長吉鄭王之孫七歲能詞章韓愈
皇甫湜聞之過其家使賦詩援筆輒就自目曰高

軒過二人大驚年二十七終協律郎賀詞尚奇詭
為詩未始先立題所得皆警邁遠去筆墨畦逕當
時無能儼者樂府十數篇雲韶工合之絃管云或
說賀卒後不相悅者盡取其所著投匱中以故世
傳者不多外集予得之梁子美家姚鉉頗選載文
粹中

宋景文諸公在館嘗評唐人詩云太白仙才長吉
鬼才然長吉有鴈門太守詩曰黑雲壓城城欲摧

甲光向日金鱗開王安石曰是兒言不相副也方
黑雲如此安得向日之甲光也

朱子語錄曰李賀詩巧然較怪不如太白自在
後村劉氏曰樂府惟李賀最工張籍王建輩皆出
其下然全集不過一小冊世傳賀中表有妬賀才
名投其集溷中故傳於世者極少余竊意不然天
地間尤物且不多得況佳句乎使賀集不遭厄必
不能一一如今所傳本之精善疑賀手自銓擇者

耳

盧仝集一卷

晁氏曰唐盧仝范陽人隱少室山號玉川子徵諫
議不起唐史稱韓愈為河南令愛其詩厚禮之嘗
作月蝕詩以譏元和逆黨愈稱其工按其詩云元
和庚寅蓋五年也憲宗遇弒在十五年後十歲也
豈追托庚寅歲事為詩乎不然則史誣也後死於
甘露之禍

陳氏曰凡三卷其詩古怪而女兒曲小婦吟有所
思諸篇輒嫵媚豔冶其第三卷號集外詩凡十首
慶歷中有韓盈者為之序川本止前二卷

劉义詩一卷

鼂氏曰唐劉义少嘗任俠殺人後更折節讀書善
歌詩客韓愈門作冰柱雪車二詩出盧仝李賀右
歸齊魯不知所終今集二十餘篇不載二詩

陳氏曰凡二卷义附見新史韓愈傳不知何處人

其冰柱雪車二詩狂怪誠出盧仝右然豈風人之
謂哉

楊巨源詩一卷

鼂氏曰唐楊巨源字景山河中人貞元五年第進
士為張弘靖從事自秘書郎擢太常博士遷禮部
員外郎出為鳳翔少尹復召除國子司業巨源在
元和中詩韻不造新語體律務實用功頗深旦暮
搖首微詠不輟年老成疾嘗贈弘靖詩叙其世家

云伊陟無聞祖韋賢不到孫時人稱之年滿七十
丐歸時宰惜其去以為其鄉少尹不絕其祿太和
以官壽卒

陳氏曰凡五卷按韓退之有送楊少尹序蓋自司
業為少尹稱其都少尹者乃其鄉里也藝文志乃
云太和河中少尹誤第三卷末二十餘篇有目無
詩

武元衡臨淮集兩卷

晁氏曰唐武元衡伯蒼河南人建中四年進士元和二年以門下侍郎平章事出為劍南節度八年復秉政明年早朝遇盜害之元衡工五言詩好事者傳之被於管絃嘗夏夜作詩曰夜久喧暫息池臺惟月明無因駐清景日出事還生翌日遇害舊有臨淮集七卷此其二也議者謂唐世工詩宦達者唯高適宦達詩工者唯元衡

陳氏曰初用莆田李氏本傳錄後以石林氏本校

益六首及李吉甫唱酬六首川本作二卷

張碧歌詩集一卷

陳氏曰唐張碧太碧撰藝文志云貞元時人集中
有覽貫休上人詩或勦入之也

陳羽集一卷

陳氏曰唐東宮衛佐陳羽撰貞元八年陸贄下第
二人

羊士諤詩一卷

鼂氏曰唐羊士諤貞元元年進士第順宗時為宣
歙巡官王叔文所惡貶汀州寧化尉元和初李吉
甫知獎擢監察御史掌制誥嘗出為資州刺史
陳氏曰竇羣引士諤為御史共傾李吉甫

鮑溶詩五卷

鼂氏曰唐鮑溶字德源元和四年進士集中有別
韓博士愈詩云不知無聲淚中感一顧厚蓋退之
所嘗推激也張薦謂溶詩氣力宏瞻博識清度雅

正高古衆才無不備具曾子固亦愛其詩以史館
本及歐公所藏互校得二百三十三篇今本有一
百九十二篇餘逸

南豐曾氏曰鮑溶詩集六卷史館書舊題云鮑防
集五卷崇文總目叙別集亦然知制誥宋敏求為
臣言此集詩見文粹唐詩類選者皆稱鮑溶作又
防之雜感詩最顯而此集無之知此詩非防作也
臣以文粹類選及防雜感詩考之敏求言皆是又

得參知政事歐陽修所藏鮑溶集與此集同然後
知為溶集決也史館書五卷總二百篇歐陽氏書
無卷第纔百餘篇然其三十三篇史館書所無今
別為一卷附於後而總題曰鮑溶詩集六卷蓋自
先王之澤熄而詩亡晚周以來作者嗜文辭抒情
思而已然亦往往有可采者溶詩尤清約謹嚴而
達理者少亦近世之能言者也故既正其誤謬且
著其大旨以傳焉

賈拾遺集一卷

陳氏曰唐左拾遺扶風賈叔向撰包何為序羣庠
年輩皆其子也

賈長江集十卷

鼂氏曰唐賈島浪仙詩共三百七十九首唐書稱
島范陽人初為浮屠名無本後從韓愈遂去浮屠
舉進士累舉進士不第文宗時坐飛謗謫長江主
簿會昌初終普州司倉參軍今長江祠堂中有石

刻大中九年墨制大中宣宗年號與傳不合據言
又載武宗時謫去尤差誤

陳氏曰韓退之有送無本詩即其人也後返初舉
進士不第文宗時坐飛謗貶長江會昌初以普州
參軍卒本傳所載如此今遂寧刊本首載大中墨
制云比者禮部奏卿風狂遂且養疾闕外今却携
卷軸潛至京城遇朕微行聞卿諷詠觀其志業可
謂屈人是用顯我特恩賜卿墨制宜從短簿別俟

殊科與傳所稱飛謗不同蓋宣宗好微行小說載
島應對忤旨好事撰此制以實之安有微行而顯
著訓詞者首稱奏卿風狂尤為好笑當以本傳亦
據其墓誌也唐貴進士科故誌言責授長江如溫
飛卿亦謫方城尉當時謂鄉貢進士不博上州刺
史則簿尉固宜謂之責授欲使今世進士得罪而
責授簿尉則惟恐責之不早耳

姚少監集十卷

鼂氏曰唐姚合也崇曾孫以詩聞元和十一年李逢吉知舉進士歷武功主簿富平萬年尉寶應中監察殿中御史戶部員外郎歷金杭二州刺史為刑戶二部郎中諫議大夫給事中陝虢觀察使開成末終祕書監世號姚武功云

陳氏曰川本卷數同編次異

莊南傑集一卷

陳氏曰唐進士莊南傑撰與賈島同時

李涉歌詩一卷

鼂氏曰唐李涉渤之弟也早從陳許辟一再謫官夷陵太和中為太學博士自號清溪子渤三詩附殷堯藩集一卷

陳氏曰唐侍御史殷堯藩撰元和九年進士

章孝標集一卷

陳氏曰唐祕書省正字章孝標撰元和十四年進士

熊孺登集一卷

陳氏曰唐西川從事熊孺登撰元和中人執易其從姪也

施肩吾西山集五卷

鼂氏曰唐施肩吾吳興人元和十五年進士以豫章之西山乃十二真仙羽化之所心慕之因卜隱焉且以名其所著自為之序

雍裕之集一卷

陳氏曰唐雍裕之撰未詳何時人

雍陶詩五卷

鼂氏曰唐雍陶國鈞太和八年進士大中六年自國子毛詩博士出刺簡州唐志集十卷今亡其半

張南史集一卷

陳氏曰唐試參軍范陽張南史撰

唐史藝文志南史字季直幽州人以試參軍避亂於揚州再召之未赴而卒

王涯集一卷

陳氏曰唐宰相王涯廣津撰

袁不約集一卷

陳氏曰唐袁不約還朴撰長慶三年進士其年試

麗龜賦

李紳追昔游集三卷

鼂氏曰唐李紳公垂也亳州人元和元年進士補國子助教穆宗召為翰林學士累進中書舍人武

宗即位拜中書侍郎平章事紳為人短小精悍於詩最有名號短李與李德裕元稹同時號三俊追昔遊者蓋賦詩紀其平生所遊歷謂起梁漢歸諫署升翰苑及播越荆楚踰嶺嶠上高安移九江過鍾陵守滁陽轉壽春留洛陽廉會稽分務東周守蜀鎮梁也開成戊午八月自為之序

陳氏曰皆平生歷官及遷謫所至述懷紀遊之作也余嘗書其後云讀此篇見其飾志矜能夸榮殉

勢益知子陵元亮為千古高人

朱景元集一卷

陳氏曰唐太子諭德朱景元撰

朱慶餘集一卷

陳氏曰唐朱可久慶餘撰以字行受知於張籍寶

歷二年進士

文獻通考卷二百四十二

欽定四庫全書

文獻通考卷二百四十三

鄱陽馬端臨貴與著

經籍考七十

集詩集

李義山集三卷

陳氏曰唐太學博士李商隱義山撰

詩話王荊公晚年亦喜稱義山詩以為唐人知學

老杜而得其藩籬惟義山一人而已每誦其雪嶺
未歸天外使松州猶駐殿前軍永憶江湖歸白髮
欲回天地入扁舟與池光不受月暮氣欲沉山江
海三年客乾坤百戰場之類雖老杜亡以過也義
山詩合處信有過人若其用事深僻語工而意不
及自是其短世人反以為奇而效之故崑體之弊
適重其失義山本不至是云詩到義山謂之文章
一厄以其用事僻澁時稱西崑體然荆公晚年亦

或喜之而字字有根蒂如試問火城將策探何如
雲屋聽窓知未愛京師傳谷口但知鄉里勝壺頭
其用事琢句前輩無相犯者

漁隱叢話李義山詩楊大年諸公皆深喜之然淺
近者亦多如華清宮詩云華清恩幸古無倫猶恐
蛾眉不勝人未免被他褒女笑只教天子暫蒙塵
用事失體在當時非所宜言也豈若崔魯華清宮
詩云障掩金雞蓄禍機翠華西拂蜀雲飛珠簾一

閉朝元閣不見人歸見燕歸又云草遮田磴絕鳴
鸞雲樹深深碧殿寒明月自來還自去更無人倚
玉欄干語意既精深用事亦隱而顯也義山又有
馬嵬詩云如何四紀為天子不及盧家有莫愁渾
河中詩云咸陽原上英雄骨半是君家養馬來如
此等詩庸非淺近乎

溫庭筠金筌集七卷 外集一卷

鼂氏曰唐溫庭筠本名岐字飛卿宰相彥博之裔

詩賦清麗與李商隱齊名時號溫李能逐弦吹之音為側艷之辭為行塵雜由是累年不第終國子助教宣宗嘗作詩賜宮人句有金步搖遣場中對之庭筠對以玉跳脫上喜其敏欲用之而嘗作詩忤時相令狐綯終廢斥云

張祐詩一卷

鼂氏曰唐張祐字承吉清河人樂高尚客淮南杜牧為度支使善其詩嘗贈之詩曰何人得似張公

子千首詩輕萬戶侯嘗作淮南詩有人生只合揚
州死禪智山光好墓田之句大中中果終丹陽隱
舍人以為識云 陳錄凡十卷

許渾丁卯集二卷

鼂氏曰唐許渾字用晦圉師之後大和六年進士
為當塗大平二令以病免起潤州司馬大中三年
為監察御史歷虞部員外睦郢二州刺史嘗分司
於朱方丁卯間自編所著因以為名賀鑄本跋云

按渾自序集三卷五百篇世傳本兩卷三百餘篇
求訪二十年得沈氏曾氏本并取擬元天竺集校
正之共得五百四十四篇予近得渾集完本五百
篇皆在然止兩卷唐藝文志亦言渾集兩卷鑄稱
三卷者誤也

陳氏曰丁卯者其所居之地有丁卯橋蜀本又有
拾遺二卷

後村劉氏曰杜牧許渾同時然各為體牧於唐律

中常寓少拗峭以矯時弊渾則不然如荆樹有花
兄弟樂橘林無實子孫忙之類律切麗密或過牧
而抑揚頓挫不及也二人詩不著姓名亦可辨樊
川有續別集三卷十之八九皆渾詩收佳句自多
不必又取他人詩益之若丁卯集割去許多傑作
則渾詩無一篇可傳矣

李遠集一卷

陳氏曰唐建州刺史李遠求古撰

于鵠集一卷

陳氏曰唐于鵠撰與張籍同時未詳何人

薛瑩集一卷

陳氏曰唐薛瑩撰號洞庭集文宗時人集中多蜀詩其曰壬寅歲者在前則為長慶四年後則為中和二年未知定何年也

薛逢歌詩二卷

鼂氏曰唐薛逢陶臣河東人會昌元年進士終祕



書監持論鯁切以謀畧高自標顯與楊收王鐸同年登第而逢文藝最優收作相逢有詩云誰知金印朝天客同是沙隄避路人鐸作相逢又有詩云昨日鴻毛萬鈞重今朝山岳一毫輕二人皆怒故不見齒

喻鳧集一卷

陳氏曰唐烏程尉喻鳧撰開成五年進士

潘咸集一卷

陳氏曰唐潘咸撰不知何人與喻鳧同時藝文志
不載

項斯集一卷

陳氏曰唐丹徒尉江東項斯子選撰初受知於張
籍水部而楊敬之祭酒亦知之有逢人說項斯之
句會昌四年進士

趙嘏渭南詩三卷

鼂氏曰唐趙嘏承祐也會昌四年進士終渭南尉

杜紫微讀其早秋詩云殘星幾點鴈橫塞長笛一聲人倚樓因謂之趙倚樓云

馬戴集一卷

陳氏曰唐馬戴虞臣撰會昌四年進士

顧非熊集一卷

陳氏曰唐盱眙主簿顧非熊况之子會昌五年進士

薛許昌集十卷

鼂氏曰唐薛能字大拙汾州人會昌六年登進士
第大中末書判中選補盤屋尉辟太原陝虢河陽
從事李福鎮滑表署觀察判官歷御史都官刑部
員外郎福徙西蜀奏以自副咸通中攝嘉州刺史
造朝遷主客度支刑部郎中俄刺同州京兆尹溫
璋貶命權知尹事出帥咸化入授工部尚書復節
度徐州徙忠武廣明元年徐軍戍澉水經許能以
軍懷舊惠館之城許軍懼見襲大將周岌乘衆

疑怒遂能據城自稱留後因屠其家能政嚴察絕私謁癖於詩日賦一章晚節惑浮屠法奉之唯謹然恣驚倨傲佻輕以忤物及為藩鎮尤易武吏嘗命其子屬橐鞬雅拜新進士或問其故曰與渠銷彌災咎云

容齋洪氏隨筆曰能晚唐人詩格調不甚高而妄自尊大其海棠詩荔枝詩折楊柳十詩序可見而所作皆無過人又別有柳枝詞五首最後一章曰

劉白蘓臺總近時當初章句是誰推纖腰舞盡春
楊柳未有儂家一首詩自註云劉白二尚書繼為
蘓州刺史皆賦楊柳枝詞世多傳唱雖有才語但
文字太僻宮商不高耳其大言如此但稍推杜陵
視劉白以下蔑如也今讀其詩正堪一笑劉之詞
云城外春風吹酒旗行人揮袂日西時長安陌上
無窮樹唯有垂楊管別離白之詞云紅板江橋青
酒旗館娃宮暖日斜時可憐雨歇東風定萬樹千

條各自垂其風流氣槩豈能所可髣髴哉

後村劉氏曰能自稱舉太過五言云空餘氣長在
天子用平人不但自譽其詩又自譽其材然位歷
節鎮不為不用矣卒以驕恣凌忽僨軍殺身其材
安在妄庸如此乃敢妄議諸葛可謂小人之無忌
憚者

李羣玉詩一卷

鼂氏曰唐李羣玉文山澧州人曠逸不樂仕進專

以吟詠自適詩筆妍麗才力邁健好吹笙美筆翰
親友強赴舉一上而止裴休廉察湖南延郡中大
中八年來京師進詩三百篇休復論薦授弘文館
校書郎集後附其進詩表并除官制太平廣記所
載黃陵廟事甚異其絕句在焉

陳氏曰裴休以處士薦集後有乞假歸別業及朝
士送行詩

曹鄴集一卷

陳氏曰唐洋州刺史曹鄴撰大中四年進士

鄭嵎津陽門詩一卷

鼂氏曰唐鄭嵎字賓先大中五年進士津陽即華
清宮之外闕嵎開成中過之聞逆旅主人道承平
故實明日馬上裁刻成長句一千四百言自有序
云

陳氏曰或作愚者非也愚嘗為嶺南節度好着錦
半臂非此鄭嵎

劉駕集一卷

陳氏曰唐劉駕司南撰大中六年進士

李頻集一卷

陳氏曰唐建州刺史新定李頻德新撰大中八年

進士姚合之壻也

李郢端公詩一卷

鼂氏曰唐李郢楚望也大中十年進士詩調清麗

居餘杭疎於馳競為藩鎮從事兼侍御史

陳蛻詩一卷

鼂氏曰唐陳蛻未詳其行事集有長安十五詠自序云蛻生長江淮間以詩句從賦僅十餘年矣今我后撫運澤及四海蛻復得為太平人云云蓋肅代間人也

柳郾詩一卷

鼂氏曰唐柳郾集有與李端盧綸輩相酬贈詩大歷間進士也

斷金集一卷

鼂氏曰唐李逢吉令狐楚自未第至貴顯所唱和詩也後逢吉卒楚編次之得六十餘篇裴夷直名曰斷金集為之序

孟達詩一卷

鼂氏曰唐孟達字叔之平昌人會昌五年陳商下及第

儲嗣宗集一卷

陳氏曰唐儲嗣宗撰大中十三年進士

司馬先輩集一卷

陳氏曰唐司馬札撰與儲嗣宗同時

李廓集一卷

陳氏曰唐武寧節度使李廓撰程之子也

于漬集一卷

陳氏曰唐于漬子漪撰咸通二年進士

李昌符集一卷

陳氏曰唐膳部員外郎李昌符撰咸通四年進士
司空表聖集十卷

陳氏曰唐兵部侍郎司空圖表聖撰咸通十年進
士別有全集此集皆詩也其子永州刺史荷為後
記

聶夷中集一卷

陳氏曰唐華陰尉聶夷中撰咸通十二年進士

許棠集一卷

陳氏曰唐宛陵許棠文化撰亦咸通十二年進士

林寬集一卷

陳氏曰唐林寬撰與李頻許棠皆同時集有送二

人詩

周繇集一卷

陳氏曰唐周繇撰咸通十三年進士

無譏集四卷

陳氏曰唐崔魯撰僖宗時人

章碣集一卷

陳氏曰唐章碣撰亦僖宗時人

高蟾集一卷

陳氏曰唐御史中丞高蟾撰乾符三年進士

崔塗集一卷

陳氏曰唐崔塗禮山撰光啓四年進士

雲臺編三卷 宜陽外編一卷

龔氏曰唐鄭谷字守愚宜陽人光啓三年擢高第

遷右拾遺歷都官郎中乾寧四年歸宜春卒於別墅其集號雲臺編者以其扈從華山下觀居所編次云谷詩屬思頗切於理而格韻凡猥語句浮俚不競不為議者所多然一時傳諷號鄭都官而弗名也

歐陽氏詩話曰鄭谷詩名盛於唐末號雲臺編而世俗但稱其官為鄭都官其詩極有意思亦多佳句但其格不甚高以其易曉人家多以教小兒余

為兒時猶誦之今其集不行於世矣

周朴詩二卷

唐處士周朴撰歐公詩話曰唐之晚年詩人無復
李杜豪放之格然亦務以精意相高如周朴者構
思尤艱每有所得必極其雕琢故時人稱朴詩月
鍛季鍊未及成篇已播人口其名重當時如此而
今不復傳矣余少時猶見其集其句有云風暖鳥
聲碎日高花影重又云曉來山雨闌雨過杏花稀

誠佳句也

韓偓詩二卷 香奩集一卷

鼂氏曰唐韓偓致光京兆人龍紀元年進士累遷
諫議大夫翰林學士昭宗幸鳳翔進兵部侍郎承
旨朱全忠怒貶濮州司馬榮懿尉天祐初挈族依
王審知而卒香奩集沈括筆談以為和凝所作凝
既貴惡其側艷故詭稱偓著或謂括之言妄許彥
周詩話高秀實言元微之詩艷麗而有骨韓偓香

匳集麗而無骨李端叔意喜韓偓詩誦其序云咀
五色之靈芝香生九竅咽三危之瑞露美動七情
秀實云勸不得也

石林葉氏曰偓在閩所為詩皆手自寫成卷嘉祐
間裔孫奕出其數卷示人龐頴公為漕取奏之因
得官詩文氣格不甚高吾家僅有其詩百餘篇世
傳別本有名香匳集者唐書藝文志亦載其辭皆
閨房不雅馴或謂江南韓熙載所為誤以為偓若

然何為錄於唐志乎熙載固當有之然吾所藏偓詩中亦有一二篇絕相類豈其流落亡聊中姑以為戲然不可以為訓矣

又曰韓偓傳自貶濮州司馬後載其事即不甚詳其再召為學士在天祐二年吾家所藏偓詩雖不多然自貶後皆以甲子歷歷自記其所在有乙丑年在袁州得人賀復除戎曹依舊承旨詩即天祐二年也昭宗前一年已弑蓋哀帝之命也末句云

若為將朽質猶擬杖於朝固不往矣其後又有丁卯年正月聞再除戎曹依前充職詩末句云豈獨鷓夷解歸去五湖魚艇且鋪糟天祐四年也是嘗兩召皆辭唐史止書其一是歲四月全忠纂其召命自哀帝之世自後復召則癸酉年南安縣之作即梁之乾化二年時全忠亦已被弑明年梁亡其兩召不行非特避禍蓋終身不食梁祿其大節與司空表聖略相等惜乎唐史不能少發明之也

唐英集三卷

陳氏曰唐翰林學士吳融子華撰與偓皆龍紀元年進士

張蠙詩一卷

鼂氏曰偽蜀張蠙字象文清河人唐乾寧中進士為校書郎櫟陽尉犀浦令建開國拜膳部員外郎後為金堂令王衍與徐后遊大慈寺見壁間書墻頭細雨垂纖草水面回風聚落花愛之問知蠙句

給札令以詩進蠙以二百首獻衍頗重之將召為
知制誥宋光嗣以其輕傲止賜白金而已蠙生而
穎秀幼能為詩作登單于臺有白日地中出黃河
天外來之句為世所稱

靈溪集七卷

陳氏曰唐校書郎上饒王貞白有道撰乾寧二年
進士其集有自序永豐人有藏之者洪景盧得而
刻之詩雖多在一時儕輩未為工也

翁承贊集二卷

陳氏曰唐諫議大夫京兆翁承贊文堯撰乾符二年進士

褚載集一卷

陳氏曰唐褚載厚之撰

王穀集一卷

陳氏曰唐王穀虛中撰二人皆乾寧五年進士

盧延讓詩一卷

鼂氏曰偽蜀盧延讓子善也范陽人唐光化九年進士朗陵雷滿辟滿敗歸王建及僭號授水部員外郎累遷給事中卒官終刑部侍郎延讓師薛能詩不尚奇巧人多誚其淺俗獨吳融以其不蹈襲大奇之

牛嶠歌詩三卷

鼂氏曰偽蜀牛嶠字延峰隴西人唐相僧孺之後博學有文以歌詩著名乾符五年進士歷拾遺補

闕尚書郎王建鎮西川辟判官及開國拜給事中
卒集本三十卷自序云竊慕李長吉所為歌詩輒
效之

韋莊浣花集五卷

鼂氏曰偽蜀韋莊字端己仕王建至吏部侍郎平
章事集乃其弟藹所編以所居即杜甫草堂舊址
故名偽史稱莊有集二十卷今止存此

王駕集一卷

陳氏曰唐彭城王駕大用撰大順元年進士自號
守素先生

喻坦之集一卷

陳氏曰唐喻坦之撰

張喬集一卷

陳氏曰唐進士九華張喬撰喬與許棠張蠡鄭谷
喻坦之等同時號十哲喬試京兆月中桂詩擅場
傳於今而登科記無名蓋不中第也

高駢集一卷

陳氏曰唐淮南節度使高駢撰

周賀集一卷

陳氏曰唐周賀撰嘗為僧名清塞後反初故別本

又號清塞集

鼂氏曰清塞字南卿詩格清雅與賈島無可齊名
寶歷中姚合為杭因攜書投謁合聞其誦哭僧詩
云凍鬚亡夜剃遺偈病中書大愛之因加以冠巾

為周賀云

李洞詩一卷

鼂氏曰唐李洞字才江諸王之孫慕賈島為詩銅鑄其像事之如神時人多誚其僻澁不貴其奇峭唯吳融稱之昭宗時不第遊蜀卒

陳氏曰與張喬同時稱餘杭明經潘熙載編

曹唐詩一卷

鼂氏曰唐曹唐字堯賓桂州人初為道士咸通中

為府從事卒作游仙詩百篇或靳之曰堯賓嘗作
鬼詩唐曰何也井底有天春寂寂人間無路月茫
茫非鬼詩而何唐乃大哂今集中不見然他詩及
神仙者尚多

陳氏曰唐有大小游仙詩

來鵬集一卷

陳氏曰唐豫章來鵬撰咸通舉進士不第

任藩集一卷

陳氏曰唐任藩撰或作翻客居天台有宿恰幘山絕句為人所稱今城中巾子山也

後村劉氏曰唐任藩詩存者五言十首而已然多佳句衆鳥已歸樹旅人猶過山贈僧云半頂髮根白一生心地清居然可愛今人動為千百首而無一可傳者

方干詩集一卷

鼂氏曰唐方干字雄飛歙人唐末舉進士不第隱

鏡湖上徐凝有詩名一見于器之授以詩律其貌
寢陋又兔闕而喜凌侮嘗謁廉帥誤三拜人號方
三拜將薦於朝而卒門人諡元英先生其甥楊弇
與孫郃編次遺詩王贊為序郃又為元英先生傳

附

王德輿詩一卷

鼂氏曰唐王德輿集有次韻和鄭畋詩知其懿偉
間人也

沈彬集一卷

鼂氏曰南唐沈彬保大中以尚書郎致仕居高安集中有與韋莊杜光庭貫休詩唐末三人皆在蜀疑其同時避亂嘗入蜀云上李昇山水圖詩在焉熊皦屠龍集五卷

鼂氏曰晉熊皦後唐清泰二年進士為延安劉景岩從事天福中說景岩歸朝擢右司諫坐累黜上津令集有陶穀序陳沆賞皦早梅云一夜欲開盡

百花猶未知曰太妃容德於是乎在

陳氏曰集中多下第詩蓋老於場屋者

杜荀鶴唐風集十卷

鼂氏曰唐杜荀鶴池州人大順二年進士善為詞
句切理宣州田頔重之嘗以牋問至梁祖薦為翰
林學士主客員外恃勢侮易搢紳衆怒欲殺之而
未及天祐初病卒有顧雲序荀鶴自號九華山人
陳錄作三卷

幕府燕談杜荀鶴詩鄙俚近俗惟宮詞為唐第一
云早被嬋娟誤欲粧臨鏡慵承恩不在貌教妾若
為容風暖鳥聲碎日高花影重年年越溪女相憶
採芙蓉故諺云杜詩三百首惟在一聯中正謂風

暖日高之句也

此句歐公詩話
以為周朴詩

詠史詩三卷

陳氏曰唐邵陽胡曾撰凡一百五十首曾咸通末
為漢南從事

羅江東集十卷

陳氏曰唐羅隱昭諫撰

劉滄詩一卷

鼂氏曰唐劉滄字蘊靈大中八年進士詩頗清麗
句法絕類趙嘏

羅鄴集一卷

鼂氏曰唐羅鄴撰

曹松集一卷

鼂氏曰唐曹松夢徵也舒州人學賈島為詩天復元年與王希羽劉象柯崇鄭希顏同登第年皆七十餘號五老榜時以新平內難聞放進士喜特敕授校書郎而卒

陳氏曰別本與印本互有詳畧但別本大遊仙十三首乃曹唐詩也

羅虬比紅兒詩一卷

鼂氏曰唐羅虬撰皇朝方性天註虬詞藻富贍與

其族人隱鄴齊名時號三羅從鄆州李孝恭籍中
有杜紅兒者善歌常為副使者屬意副使聘鄰道
虬請紅兒歌贈之以綵孝恭不令受虬怒拂衣起
詰旦手刃之既而追其冤作絕句詩百篇借古人
以此其艷盛行於世

唐彥謙鹿門詩一卷

鼂氏曰唐唐彥謙字茂鄴并州人咸通末進士中
和王重榮表河中從事歷節度副使晉絳二州刺

史重榮遇害貶漢中掾興元楊守亮留署判官遷
副使閬壁刺史卒彥謙才高負氣無所推屈博學
多藝尤能七言詩師溫庭筠故格體類之世稱耳
聞明主提三尺眼見愚民盜一抔蓋彥謙句也自
號鹿門先生有薛廷珪序

後村劉氏曰揚劉諸人師李義山可也又師唐彥
謙唐詩雖雕斲對偶然求如一抔三尺之聯惜不
多見五言叙亂離云不見泥函谷俄驚火建章剪

茅行殿濕伐栢舊陵香語猶渾成未甚破碎若西
崑酬唱集對偶字面雖工而佳句可錄者殊少宜
為歐公所厭也

秦韜玉投知小錄三卷

鼂氏曰唐秦韜玉字中明京兆人有詞藻工歌吟
險而好進為田令孜所善僖宗幸蜀令孜引為工
部侍郎中和二年賜進士第編入春榜

東浮集九卷

陳氏曰唐荆南崔道融撰自稱東歐散人乾寧乙卯永嘉山齋編成蓋避地於此今闕第十卷

唐詩三卷

陳氏曰崔道融撰皆四言詩述唐中世以前事實事為一篇篇各有小序凡六十九篇

裴說集一卷

陳氏曰唐裴說撰天祐三年進士狀頭唐蓋將亡矣說後為禮部員外郎世傳其寄邊衣古詩甚麗

此集無之僅有短律而已非全集也其詩有避亂
一身多之句

劉德仁詩集一卷

鼂氏曰唐劉德仁公主之子長慶中以詩名五言
清瑩獨步文場者開成後昆弟皆居顯仕獨自苦
於詩舉進士二十年竟無所成嘗有寄所知詩云
外族帝王恩中朝親故稀翻令浮議者不許九霄
飛及卒詩僧棲白以絕句弔之曰忍苦為詩身到

此冰魂雪魄已難招直教桂子落墳上生得一枝

寃始銷

唐求集一卷

陳氏曰唐唐求撰與顧非熊同時藝文志不載

李山甫集一卷

陳氏曰唐魏博從事李山甫撰唐末進士不第

邵謁集一卷

陳氏曰唐國子生曲江邵謁撰集後有胡賓王者

為之序言其沒後降巫賦詩自稱邵先輩殆若今
世請大仙之類邪

李推官披沙集六卷

陳氏曰唐李咸用撰其八世孫兼孟達居宛陵亦
能詩嘗為台州出其家集求楊誠齋作序

誠齋序畧曰推官公詩如見後却無語別來長獨
愁如危城三面水古樹一邊春如月明千嶠雪灘
急五更風如煙殘偏有焰雪甚却無聲如春雨有

五色灑來花旋成如雲蔽山色時還媚風約溪聲
靜又回如未醉已知醒後憶欲開先為落聲愁蓋
征人淒苦之情孤愁窈眇之聲騷客婉約之靈風
物榮悴之英所謂周禮盡在魯矣讀之使人發融
冶之歡於荒寒無聊之中動慘戚之感於笑談方
懌之後國風之遺音江左之異曲孰謂其果弦絕
歟

黃御史集

誠齋序畧曰詩至唐而盛至晚唐而工御史黃公之詩尤奇如聞鴈一聲初觸夢半白已侵頭餘燈依古壁片月下滄洲如遊東林寺寺寒三伏雨松偃數朝枝如退居青山寒帶雨古木夜啼猿此與韓致光吳融輩並遊未知何人徐行後長也永豐君自言其集久逸其父考功公始得之僅數卷而已其後永豐又得詩文五卷於呂夏卿之家又得逸詩於翁承贊之家又得銘碣於浮屠老子之宮

而後御史公之文復傳於二百年之後按唐藝文志御史諱滔字文江光啓中為四門博士其集舊曰黃滔集云

于武陵集一卷 周漬集一卷 陳光集一卷 劉威集一卷

陳氏曰皆唐人于武陵大中進士餘莫詳何時漬集仍藝文志不載

胡笳十八拍一卷

八二五十三
鼂氏曰唐劉商撰漢蔡邕女琰為胡騎所掠因胡人吹蘆葉以為歌遂翻為琴曲其辭古淡商因擬之以叙琰事盛行一時商彭城人擢進士第歷臺省為郎好道術隱義興胡父渚世傳其仙去

鼎國詩三卷

鼂氏曰後唐李雄撰雄洛鞏人莊宗同光甲申歲遊金陵成都鄴下各為詠古詩三十章以三國鼎峙故曰鼎國

李有中詩二卷

鼂氏曰南唐李有中嘗為新塗令與水部郎中孟
賓于善賓于稱其詩如方干賈島之徒賓于晉天
福中進士也有中集中有贈韓張徐三舍人詩韓
乃熙載張乃洎徐乃鉉也春月詩云乾坤一夕雨
草木萬方春頗佳他皆稱是

殷文珪集一卷

陳氏曰唐殷文珪撰乾寧五年進士後仕南唐其

子曰崇義歸朝更姓名即湯悅也

盧士衡集一卷

陳氏曰後唐盧士衡撰天成二年進士

劉昭禹集一卷

陳氏曰湖南天策府學士桂陽劉昭禹撰

符蒙集一卷

陳氏曰題符侍郎同光三年進士也同年四人蒙

初為狀頭覆試為第四

李建勳集一卷

陳氏曰南唐宰相李建勳撰

孟賓于集一卷

陳氏曰五代進士孟賓于撰仕湖南江南

廖匡圖集一卷

陳氏曰湖南從事廖匡圖撰

江為集一卷

陳氏曰五代建安江為撰為王氏所誅當漢乾祐

中

劉一集一卷

陳氏曰似唐末五代人藝文志不載其詩怪而不律亦不工

文丙集一卷

陳氏曰稱布衣文丙所業未詳何人

蔣吉集一卷 蘓拯集一卷 王周集一卷

陳氏曰皆未詳何人

皎然杼山集十卷

鼂氏曰唐僧皎然字清晝吳興人謝靈運十世孫
攻篇什德宗詔錄本納集賢院集前有于頔序并
贈畫上人詩

陳氏曰顏魯公為刺史與之酬倡其後刺史為作
集序所居龍興寺之西院今天寧寺是也又嘗居
杼山寺在妙喜

唐史藝文志顏真卿為刺史集文士撰韻海鏡源

預其論著貞元中集賢御書院取其集藏之

石林葉氏曰唐詩僧皎然居湖州妙喜今寶積寺
是其故廬自言謝靈運後詩祖其家法自許甚高
顏魯公為守時與張志和陸鴻漸皆為客意其人
品亦必不凡吾嘗至妙喜訪其遺跡無復有但山
巔墳存耳其詩十卷尚行於世無甚令人喜者以
為優於唐詩僧可也觀其詩評亦貶駁老杜如論
送高三十五書記詩云崆峒小麥熟且願休王師

請君問主將安用窮荒為以為四句已前不見題
則其所知可見矣

僧靈澈詩集一卷

澈姓湯字源澄越州人劉夢得序曰如芙蓉園新
寺詩云經來白馬寺僧到赤烏年謫汀州云青蠅
為弔客黃耳寄家書可謂入作者閭域豈特雄於
詩僧間邪雪浪齋日記靈澈詩僧中第一如海月
生殘夜江春入暮年窻風枯硯水山雨慢琴弦
前

評此詩云轉
石下千仞江

寶月詩一卷

鼂氏曰唐僧貫休撰字德隱姓姜氏婺州人後入
蜀號禪月大師初吳融為之序其弟子曇域削去
別為序引偽蜀乾德中獻之

靈一集一卷

陳氏曰唐僧與皇甫曾同時

無可集一卷

陳氏曰唐僧賈無可撰島弟也

碧雲詩一卷

鼂氏曰唐僧虛中詩也司空圖嘗以詩贈之云十年太華無知己只得虛中一首詩

白蓮集一卷

陳氏曰唐僧齊己撰長沙胡氏

柳白集一卷 修睦東林集一卷 尚顏供奉集一卷

陳氏曰皆唐僧自貫休而下盡唐末人也修睦死

於維揚朱瑾之難

薛洪度詩一卷

鼂氏曰唐薛濤字洪度西川樂妓工為詩當時人多與酬贈武元衡奏校書郎大和中卒李肇云樂妓而工詩者濤亦文妖也

陳氏曰號薛校書世傳奏授恐無是理殆一時州鎮褒借為戲如今世白帖借補之類邪濤得年最長至近八十

李季蘭集一卷

陳氏曰唐女冠與劉長卿同時相譏調之語見中興間氣集

魚元機集一卷

陳氏曰唐女冠坐妬殺女婢抵死

花藥夫人詩一卷

鼂氏曰偽蜀孟昶愛姬青城費氏女幼能屬文長於詩宮詞尤有思致蜀平以俘輸織室後有罪賜

死

伍喬集一卷

陳氏曰本江南進士後歸朝

李九齡集一卷

陳氏曰洛陽李九齡撰乾德二年進士第三人

文獻通考卷二百四十三

欽定四庫全書

史部

文獻通考卷二百四十五

詳校官閣學士_臣瑞保

編修_臣程嘉謨覆勘

覆校官中書_臣孫希旦

校對官中書_臣王彞憲

膳錄監生_臣方汝觀

欽定四庫全書

文獻通考卷二百四十四

鄱陽馬端臨

貴與著

經籍考七十一

集詩集

寇忠愍詩三卷

鼂氏曰寇準字平叔華州人太平興國中登進士

科淳化五年參知政事定策立真宗為皇太子景

德元年拜平章事契丹入寇決親征之策凡三八
相真宗不豫皇后豫政準白上請太子監國因令
楊億草制且進億以代丁謂詰朝準被酒漏言累
貶雷州司戶徙衡州司馬卒仁宗時贈中書令諡
忠愍嘗封萊國公初篤學喜屬文尤長詩什多得
警句在相位論議忠直不顧身謀仇邪媒孽既以
謫死或又謗之云在相位時與張齊賢相傾朱能
為天書降乾祐準知而不言魯子固明其不然曰

審如是丁謂拂須固足以悅之司馬溫公訓儉文亦言其奢侈子孫丐於海上然以史考之萊公蓋無子也集有范雍叙共二百四十首野水無人渡及江南春二首皆在獨到海只十里之詩已亡其全篇矣

陳氏曰巴東集三卷公初以將作監丞知巴東縣自擇其詩百餘篇且為之序今刻於巴東忠愍公集三卷乃河陽守范雍得公詩二百首為三卷今

刻板道州

張刑部詩

王介甫序君詩明而不華喜諷道而不刻切其唐人善詩者之徒歟君並楊劉生楊劉以其文詞染當世學者迷其端原靡然窮日力以摹之粉墨青朱顛錯叢厖無文章黼黻之序其屬情籍事不可考據也方此時自守不污者少矣君詩獨不然其自守不污者邪

魏仲先草堂集二卷

鉅鹿東觀集二卷

鼂氏曰魏野字仲先陝州人志清逸以吟詠自娛
忘懷榮利隱於陝之東郊手植竹木繞以流泉鑿
土袤丈曰樂天洞前立草堂為詩清苦句多警策
與寇準王旦善每往來酬唱祀汾陰歲召不起卒
贈著作郎集有薛田序鉅鹿東觀集乃野之子閑
集其父詩四百篇以贈著作故以東觀名集

潘逍遙詩三卷

鼂氏曰皇朝潘閬字逍遙大名人通易春秋尤以詩知名太宗嘗召對賜進士第將官使之不就王繼恩與之善繼恩下獄捕閬甚急久之弗得咸平初來京師尹收繫之真宗釋其罪以為滁州參軍後卒於泗上與王禹偁孫何柳開魏野交好最密集有祖無擇序錢易張遠皆碣其墓附於集後蘓子瞻少年時過一山院見壁上有句云夜涼知有雨院靜若無僧而不知何人詩今集有此聯乃閬

夏日宿西禪院詩也小說中謂閻坐盧多遜黨嘗追捕非也

陳氏曰閻嘗賜及第後坐追奪變姓名僧服入中條山卒於泗州又有嚴陵刻本同但少卷末三首東里楊聘君集一卷

陳氏曰處士鄭圃楊朴契元撰太宗嘗召對拜郎中不受以其子為長水尉

滕工部集一卷

陳氏曰滕白撰篇首寄陳搏知為國初人又有右省懷山中及臺中寄朱從事詩則其揚歷清要亦多矣史傳亡所見未有考也

王岳集一卷

陳氏曰王岳撰集中有春日感懷上滕白郎中蓋亦國初人又有聖駕親征河東及有甲午避寇全家欲下荆南之語則是李順亂蜀之歲岳蓋蜀人也

漁舟集一卷

陳氏曰處士成都郭震希聲撰自稱汾陽山人李
旼為作集序淳化四年忽作詩曰朝出東門遊東
門好春色青青原上草莫放征馬食詣闕獻書言
蜀利病未幾順賊已作矣

王初歌詩集一卷

陳氏曰王初撰未詳何人有延平天慶觀詩當是
祥符後人也

書臺集三卷

陳氏曰處士南隆朱有大有撰自稱雲臺山人天禧中王晦叔守蜀以古風六十言遺之書臺者其所居坊名也

甘棠集一卷

陳氏曰知制誥上蔡孫僅鄰幾咸平元年進士第一人後其兄何一勝嘗從何通判陝府以所賦詩集而序之首篇曰甘棠思循吏故以名集僅兄弟

皆不壽故不大顯

錢希白歌詩二卷

陳氏曰翰林學士吳越錢易希白撰廢王侑之子
咸平二年進士第二人景德二年制科初錢氏歸
國羣從皆補官獨易與兄昆不見錄遂刻志讀書
皆第進士昆至諫議大夫易子彥遠明逸又皆以
賢良方正入等宋興父子兄弟制舉登科者惟錢
氏一門易有集百五十卷未見家止有此及滑稽

集四卷而已

林和靖詩三卷 西湖紀逸一卷

鼂氏曰林逋字君復杭州錢塘人少立志為學結廬西湖之孤山真宗聞其名詔郡縣常存遇之善行書喜為詩其語孤峭澄淡臨終作一絕曰茂陵他日求遺藁猶喜初無封禪書或剌石置之其墓中賜諡曰和靖先生

清風集一卷

陳氏曰職方員外郎鮑當撰

石曼卿集一卷

鼂氏曰石延年字曼卿南京宋城人舉進士不中
為三班奉職改太常寺太祝遷祕閣校理氣貌雄
偉喜論事善書札縱酒不羈世多傳其仙去其詩
如春陰紅梅及樂意相關禽對語生香不斷樹交
花鶯聲不逐春光老花影常隨日脚流之句至今
諷詠焉

陳氏曰其詩自為序石介復為作序其仕以三舉進士為三班奉職出處詳見歐公所作墓誌

歐公詩話曰石曼卿自少以詩酒豪放自得其氣貌偉然詩格奇峭又工於書筆畫遒勁體兼顏柳為世所珍余家嘗得南唐後主澄心堂紙曼卿為余以此紙書其籌筆驛詩詩曼卿平生所自愛者至今藏之號為三絕真余家寶也曼卿卒後其故人

人有見之者云恍惚如夢中言我今為鬼仙也所

主芙蓉城欲呼故人往遊不得忿然騎一素騾去
如飛其後又云降於亳州一舉子家又呼舉子去
不得因留詩一篇與之余亦略記其一聯云鶯聲
不逐春光老花影長隨日脚流神仙事怪不可知
其詩頗類曼卿平生語舉子不能道也

張浮休評曼卿詩如飢鴈夜歸巖冰春折俊爽有
餘而不可尋繹朱子語錄因舉曼卿詩極有好處
如仁者雖無敵王師固有征無私乃時雨不殺是

天聲長篇某舊於某人處見曼卿親書此詩大字
氣象方嚴遒勁極可寶愛真所謂顏筋柳骨令人
喜蘓子美字遠不及矣如籌筆驛詩意中流水遠
愁外舊山青又樂意生香之句極佳惜不見全集
後村劉氏曰曼卿詩惟籌筆驛詞翰俱妙人所傳
誦及樂意相關禽對語生香不斷樹交花一聯為
伊洛中人所稱他作苦不甚見晚得其集石徂徠
作序稱其與穆參軍以古文自任而曼卿尤豪於

詩石自序性懶有作不能錄早時解記數百篇過
壯記益衰近幾盡廢有收百篇來者覽之或尚能
識或如非已言久廼能辨遂併近詩存三百篇藏
之於家歐公尤重其人范公有鑿幽索祕破堅發
竒高凌虹霓清出金石之評集中華山泰山嵩山
五言長篇各一首筆力在薛能之上餘警句尚多
五言云行人晚更急歸鳥夕無行天寒河影淡山
凍瀑聲微水盡天不盡人在天盡頭草白有時榮

髮白不再好人生不如春髮白不如草弋下失冥
鴻網細遺巨鷗風勁香逾遠天寒色更鮮秋天買
不斷無意學金錢七言云洛渚微波長映步漢宮
香水不濡肌獨步世無吳苑艷渾身天與漢宮香
恥居湯武干戈域寧死唐虞揖遜區汾河不斷天
南流天色無情淡如水南朝文物盡清賢不事風
流即放言三百年間却堪笑絕無人可定中原中
散向人踈懶甚步兵因酒過差多皆清拔有氣骨

呂文靖集五卷

陳氏曰丞相許國文靖公壽春呂夷簡坦夫撰文靖不以文鳴而其詩清潤和雅未易及也

陳亞之集一卷

鼂氏曰陳亞字亞之性滑稽喜賦藥名詩仕至司封郎中藥名詩始於唐人張籍有江臯歲暮相逢地黃葉霜前半下枝之詩人謂起於亞實不然也陳氏曰咸平五年進士有集三卷藥名詩特其一

體耳如馬嘶曾到寺犬吠乍行村吏辭如賀日民
送自迎時皆佳句不在此集也

金陵覽古詩三卷

陳氏曰虞部員外郎楊備撰億之弟也

李問集一卷

陳氏曰國子博士廣陵李問舜愈撰

蘓才翁集一卷

鼂氏曰蘓舜元字才翁子美兄也工草隸詩章豪

麗

鼂君成集十卷 別集一卷

陳氏曰新城令鼂端友君成撰東坡為作序補之其子也

東坡序略曰鼂君成君子人也吾與之游三年知其為君子而不知其能文與詩而君亦未嘗一語及此者其後君既沒其子補之出君之詩三百六十篇讀之而驚曰嗟乎詩之指雖微然其美惡高

下猶有可以言傳而指見者至於人之賢不肖其
深遠茫昧難知蓋甚於詩今吾尚不能知君之能
詩則其所謂知君之為君子者果能盡知之乎君
以進士得官所至民安樂之惟恐其去然未嘗以
一言求於他人凡從事二十三年而後改官以沒
由此觀之非獨吾不知舉世莫知之也君之詩清
厚靜深如其為人而每篇輒出新意奇語宜為人
所共愛其勢非君深自覆匿人必知之而其子補

之於文無所不能博辨俊偉絕人遠甚將必顯於世吾是以知有其實而辭其名者之必有後也

杜師雄詩一卷

鼂氏曰宋朝杜默字師雄徂徠人石介作三豪篇所謂歌之豪者蘓子瞻頗陋之

鄭成之集十卷

鼂氏曰宋朝鄭褒字成之閩人登進士第慕韓愈為文陳詒為編次其集張景為之序

將歸集一卷

鼂氏曰未詳何人有題林逋隱居詩當是昭陵時人也

徐仲車詩一卷

鼂氏曰宋朝徐積字仲車東莞人

黃虞部詩一卷

鼂氏曰宋朝黃觀昭陵時嘗將漕成都

邵堯夫擊壤集二十卷

鼂氏曰宋朝邵雍堯夫隱居洛陽熙寧中與常秩同召力辭不起邃於易數始為學至二十年不施枕榻睡其精思如此歌詩蓋其餘事亦頗切理盛行於時卒諡康節集自為序

朱子語錄康節之學其骨髓在皇極經世書其花草便是詩

韓持國詩三卷

鼂氏曰韓維字持國億之子也與其兄子華玉汝

俱位宰相持國最能詩世傳其醅醖絕句他多稱是

註荆公詩十五卷

陳氏曰參政眉山李壁季章撰謫居臨川時所作助之者曾極景建魏鶴山作序

石林詩話曰荆公少以意氣自許故詩語惟其所向不復更為涵蓄如天下蒼生待霖雨不知龍向此中蟠又濃綠萬枝紅一點動人春色不須多又

平治險穢非無力潤澤焦枯是有才之類皆直道
其胷中事後為羣牧判官從宋次道盡假唐人詩
集博觀而約取晚年始盡深婉不迫之趣乃知文
字雖工拙有定限然必視其幼壯雖公方其未至
亦不能力強而遽至也

又曰荆公晚年詩律尤精嚴造語用字間不容髮
然意與言會言隨意遣渾然天成殆不見有牽率
排比處如含風鴨綠鱗鱗起弄日鶯黃裊裊垂讀

之初不覺有對偶至細數落花因坐久緩尋芳草
得歸遲但見舒閑容與之態耳而字字細考之皆
經櫟括權衡者其用意亦深刻矣嘗與葉致遠諸
人和頭字韻詩往返數四其末篇云名譽子真居
谷口事功新息困壺頭以谷口對壺頭其精切如
此後數月取本追改云豈愛京師傳谷口但知鄉
里勝壺頭今集中兩本並存

漫叟詩話荆公定林後詩精深華妙非少作之比

嘗作歲晚詩云月映林塘靜風涵笑語涼俯窺憐
淨綠小立佇幽香携幼尋新葯扶衰上野航延緣
久未已歲晚惜流光自以比謝靈運議者亦以為
然

後山詩話魯直謂荆公之詩莫年方妙然格高而
體下如云自聞青秧底復作龜兆坼乃前人所未
道又云扶輿度陽燄窈窕一川花謂包含數个意
雖前人亦未道然學三謝失於巧耳

又云荆公詩云力去陳言誇末俗可憐無益費精神而公平生文體數變莫年詩益工用意益苦故言不可不謹也

張浮休評王介甫詩如空中之音相中之色欲有執着而曾不可得

臨川詩選一卷

陳氏曰汪藻彥章得半山別集皆罷相山居時老筆過江失之遂於臨川集錄出又言有表啓十餘

篇不存一字

註東坡詩四十二卷 年譜目錄各一卷

司諫吳興施元之德初與吳郡顧景蕃共為之元
之子宿從而推廣且為年譜以傳於世陸放翁作
序頗言註之難蓋其一時事實既非親見又無故
老傳聞有不能盡知者噫豈獨坡詩哉註杜詩者
非不多往往穿鑿附會皆臆決之過也

張浮休評子瞻詩如武庫初開戈矛森然觀者不

覺神懣若一一尋之不無利鈍

放翁陸氏序略曰唐詩人最盛名家者以百數惟杜詩註者數家然槩不為識者所取近世有蜀人任淵嘗註宋子京黃魯直陳無已三家詩頗稱詳瞻若東坡先生之詩則援據閎博指趣深遠淵獨不敢為之說某頃與范公至能會於蜀因相與論東坡詩慨然謂余足下當作一書發明東坡之意以遺學者某謝不能後二十五年某告老居山陰

吳興施宿武子出其先人司諫公所註數十大篇
屬某作序司諫公以絕識博學名天下且用功深
歷歲久又助之以顧君景蕃之談洽則於東坡之
意蓋幾可以無憾矣

山谷集十一卷 外集十一卷 別集二卷

陳氏曰黃庭堅魯直撰江西所刻詩派即豫章前
後集中詩也別集者慶元中莆田黃汝嘉增刻

山谷編年詩集三十卷 年譜二卷

陳氏曰山谷詩文其甥洪氏兄弟所編斷自進德堂以後今外集所載數卷有晚年刪去者故任子淵所註亦惟取前集而已監丞黃齋子耕者其諸孫也即會粹別集復盡取其平生詩以歲月次第編錄且為之譜今刊板括蒼

後山集六卷 外集五卷

陳氏曰陳師道無已撰亦於正集中錄出入詩派江西宗派之說出於呂本中居仁前輩固有議其

不然者矣後山雖曰見豫章之詩盡棄其學而學焉然其造詣平澹真趣自然實豫章之所闕也

註黃山谷詩二十卷 註後山詩六卷

陳氏曰新津任淵子淵註鄱陽許尹為序大抵不獨註事而兼註意用工為深二集皆取前集陳詩以魏衍集記冠焉

後村劉氏曰國初詩人如潘閔魏野規規晚唐格調寸步不敢走作楊劉則又專為崑體故優人有

擣扯義山之誚蘓梅二子稍變以平淡豪俊而和之者尚寡至六一坡公巍然為大家數學者宗焉然二公亦各極其天才筆力之所至而已非必鍛鍊勤苦而成也豫章稍後出會粹百家句律之長究極歷代體制之變蒐獵奇書穿穴異聞作為古律自成一家雖隻字半句不輕出遂為本朝詩家宗祖在禪學中比得達磨不易之論也其內集詩尤善信乎其自編者頃見趙履常極宗師之近時

詩人惟趙得豫章之意有絕似之者

又曰後山樹立甚高其議論不以一字假借人然
自言其詩師豫章公或曰黃陳齊名何師之有余
曰射較一鏃奕角一着惟詩亦然後山地位去豫
章不遠故能師之若問秦黽諸人則不能為此言
矣此惟深於詩者知之文師南豐詩師豫章二師
皆極天下之本色故後山詩文高妙一世然題太
白畫像云江西勝士與長吟後來不憂身陸沉勝

士謂饒德操也按德操此詩去手污吾足之作大爭地位太白非德操遂陸沉邪似非篤論

盧載雜歌詩一卷

陳氏曰盧載厚元撰集中有與胡則錢惟演往來詩

琴軒集一卷

陳氏曰題南榮浪翁李有慶撰與石昌言任師中同時卷末贈答十二絕闕其六其曰癸巳歲者殆

皇祐中邪

元章簡詩集十卷

陳氏曰參政元絳厚之撰

劉景文集十卷

陳氏曰左藏庫使知隰州劉季孫景文撰環慶死
事將平之子也東坡嘗薦之坡在杭季孫寄詩有
四海共知霜鬢滿重陽曾插菊花無之句其詩慷
慨有氣如其為人

廣諷味集五卷

陳氏曰吏部侍郎南京王欽臣仲至撰

海門集八卷

陳氏曰渤海張重撰有上蘓子瞻內翰詩又有張伯玉遊鑑湖晚歸詩伯玉知越州當嘉祐末而東坡為翰苑在元祐間重皆與同時特未詳其人

王岐公宮詞一卷

陳氏曰王珪禹玉撰

逸民鳴一卷

陳氏曰盱江李樵撰泰伯之姪孫

湛推官集一卷

陳氏曰長樂湛鴻季潛撰紹聖初韓昌國序

青山集三十卷

陳氏曰朝奉郎當塗郭祥正功父撰初見賞於梅
聖俞後見知於王介甫仕不達而卒李端叔晚寓
其鄉祥正與之爭名未嘗同堂至為俚語以譏誚

之則其為人不足道也

張浮休評郭祥正詩如大排筵席二十四味終日
揖讓而適口者少

方祕校集十卷

陳氏曰莆田方惟深子通撰其父屯田龜年葬吳
遂為吳人與朱伯原善以女嫁伯原之子嘗舉進
士冠其鄉不第晚得興化軍助教年八十三以卒
王荊公最愛其詩精詣警絕始余得其詩二卷乃

其姪孫蕭山宰翺所編後乃知莆中嘗刊板為十卷且載程俱致道所作墓誌於末曾慥詩選直以為姑蘓人者誤也詩選又言荆公愛其春江渺渺一絕手書之遂載臨川集曾紆南游記舊亦云而其詩則客帆收浦者也二詩皆不在今集中豈以臨川集已收故邪二本大畧同亦微有出入

慶湖遺老集九卷 拾遺二卷

陳氏曰朝奉郎共城賀鑄方回撰自序言外監知

章之後且推本其初出王子慶忌以慶為姓居越之湖澤今所謂鏡湖者本慶湖也避漢安帝父清河王諱改為賀氏慶湖亦轉為鏡未知其說何所據也其東山樂府張文潛序之鑄後居吳下葉少蘊為作傳詳其出處且言與米芾齊名然鑄生皇祐壬辰視米芾猶為前輩也

操縵集五卷

陳氏曰周邦彥撰亦有全集中所無者

司馬才仲夏陽集兩卷

鼂氏曰司馬禎字才仲溫公之姪孫元祐初與王當輩同中賢良科調官錢塘喜賦宮體詩故世傳其為鬼物所崇而卒

司馬才叔逸堂集十卷

鼂氏曰司馬棫字才叔才仲之弟也登進士第亦嘗應賢良以黨錮不召詩雖纖艷比其兄稍莊雅得全居士集三卷

陳氏曰趙鼎元鎮撰全集號忠正德文其曾孫壁
別刊其詩附以樂府陸游曰忠簡謫朱崖臨終自
書銘旌曰身騎箕尾歸天上氣作山河壯本朝嗚
呼可不謂偉人乎

高隱集七卷

陳氏曰高隱處士蘄春林敏功子仁撰嘗以春秋
鄉薦不第有詩文百卷號蒙山集兵火後不存

無思集四卷

陳氏曰林敏修子來撰敏功之弟

後村劉氏曰三林詩極少曾端伯作高隱小傳云
有詩文百二十卷今所存十無一二兄弟皆隱君
子不獨以詩重

柯山集二卷

陳氏曰齊安潘大臨邠老撰所謂滿城風雨近重
陽者也

後村劉氏曰東坡文潛先後謫黃州皆與邠老游

其詩自云師老杜然有空意無實力余舊讀之病其深蕪後見夏均父讀邵老詩亦有深蕪之評

溪堂集五卷 補遺二卷

陳氏曰臨川謝逸無逸撰

漫叟詩話謝無逸學古高傑文詞煅煉篇篇有古意尤工於詩

冷齋夜話無逸工詩能文黃魯直讀其詩曰鼂張流也恨未識之耳無逸詩曰老鳳垂頭噤不語枯

木槎牙噪春鳥又曰貪夫蟻旋磨冷官魚上竿又
曰山寒石髮瘦水落溪毛彫皆為魯直所稱賞

竹友集七卷

陳氏曰謝邁幼槃撰逸之弟

後村劉氏曰呂紫微評無逸詩似康樂幼槃詩似
元暉按康樂一字百鍊乃出冶元暉尤麗密無逸
輕快有餘而欠工緻幼槃差苦思其合元暉者亦
少然弟兄在政宣間科舉之外有岐路可進身韓

子蒼諸人或自鬻其技至貴顯二謝乃老死布衣
其高節亦不可及

日涉園集十卷

陳氏曰廬山李彭商老撰公祥之從孫

後村劉氏曰商老公擇尚書家子弟也東坡山谷
文潛諸公皆與往還頗博覽強記然詩體拘狹少
變化

清非集二卷

陳氏曰豫章洪朋龜父撰

老圃集一卷

陳氏曰諫議大夫洪芻駒父撰

西渡集一卷

陳氏曰中書舍人洪炎玉父撰洪氏弟兄四人其母黃魯直之妹不淑早世所為賦毀壁者也龜父舉進士不第其季羽鴻父坐上書元符入籍終其身芻炎皆貴而芻靖康失節貶廢羽詩不傳

後村劉氏曰三洪與徐師川皆豫章之甥龜父警句往往前人所未道然早卒惜不多見駒父詩尤工初與龜父游梅仙觀龜父有詩卒章云願為龍鱗嬰勿學蟬骨蛻是以直節期乃弟矣駒父後居上坡晚節不終不特有愧於舅氏亦有愧於長君也玉父南渡後為少蓬聞師川名有懷駒父詩云欣逢白鶴歸華表更想黃龍出羽淵然師川卒不能返駒父於鯨波之外玉父愛兄之道至矣余讀

而悲之

岷山百境詩二卷

鼂氏曰王宋字道輔少有能詩名世謂其詩初若不經意然遣辭屬意清麗絕人自號南陔居士宣和中以狂譎被譖伏誅

楊天隱詩十卷

鼂氏曰皇朝楊恬字天隱潼川人

文獻通考卷二百四十四